



UNIVERSITÄTS-  
BIBLIOTHEK  
PADERBORN

**Tertia Seraphica Vinea, Sive Tertius Ordo De Poenitentia  
à S.P.N. Francisco institutus**

**Pauck, Engelbert**

**Coloniae, 1720**

Num. 23. Constitutio Innoc. XI. circa Eleemosynas pro Concionibus  
oblata, distributionem librorum, augmentationem Bibliothecurium.  
Innovaturque excommunicatio contra quoscunque auferentes libros, & ...

---

[urn:nbn:de:hbz:466:1-64103](https://nbn-resolving.org/urn:nbn:de:hbz:466:1-64103)

qui ad prædicationem eorum accesserint, tunc eorum Sacerdotibus valeant confiteri, quatenus ad prædicta suscipienda vestris exhortationibus præparati (tanquam bona, & fructifera terra) pro viriorum tribulis incipiant segetes germinare virtutum; & dicti Fratres per cooperationem vestram suscepti ministerii cursum feliciter consummando, optatum reportent sui laboris fructum, & finem: videlicet Salutem animarum. Quia &c. *Datum Viterb. XI. Kal. Jun. Pontificatus anno II.* Alias huic similes ad Orbis & Ecclesiarum Prælatos direxerunt *Innocentius IV.* ex urbe Lugduni. *Alexander IV.* ex Neapolitana. Hujus litteræ incipiunt: *Patris æterni* In quibus inter alia pro Fratribus Minoribus annuntiat dictis Prælati:

*Hi sunt:* qui vitam & merita Beatissimi Pauli Apostoli contemplantes gloriantur in sola Cruce Domini, spernendo mundi solatia pro deliciis paradisi. Hi sunt: qui hostes animæ per scutum fidei, loricam justitiæ, gladium spiritûs, salutis galeam, hastam perseverantiæ debellantes, obtinere satagunt, ut Catholicis universis, Fidei, Spei, & Charitatis augmenta proveniant, ac perfidis veritatis via pateat, & hæreticæ pravitatis insania evanescat. De tantorum siquidem meritorum provenit claritate: quòd nos eosdem Fratres in Christo affectu sincerissimo diligamus, & ipsos ubique terrarum, statu gaudere pacifico affectemus, pro re indignâ, & nimis amarâ ducentes; si quis de numero Fidelium, & potissimè Prælatorum, eos aliquibus turbet injuriis, vel offensis. Rogamus itaque devotionem vestram, & per Dei misericordiam obsecramus, per Scripta Apostolica vobis mandantes, ac remissionem vobis peccatorum indulgentes; quatenus illos (qui sunt ex eis, in vestris civitatibus, & Diœcesibus constituti, seu qui ad præsentiam vestram quandocunque per-

venerunt,) pro divina & nostra reverentia affabiliter & benignè recipere, eosque vestræ charitatis studeatis affluentiam confovere, permittendo: eos uti liberè Regularibus suis Observantiis, & Statutis per Sedem Apostolicam approbatis, Indulgentiis etiam, & litteris; quas circumspecta pietas Sedis ejusdem olim concessisse dignoscitur de gratia sua speciali. Cæterum prædictos Fratres de favoris vestri plenitudinè plenius honorantes, eis liberaliter concedatis, & quæ sunt opportuna, pro animarum salute, fieri ab eis, auctoritate vestrâ, liberè valeant exerceri; præsertim, cum & ipsi cordi habeant ministerium suum ita laudabiliter & prudenter exequi: quòd exinde apud vos possint sinceram, & stabilem benevolentiam promereri; preces autem nostras, quas vobis ex intimo cordis affectu dirigimus, sic adimpleat vestra sinceritas, quòd propter hoc urbis gratiosi favoris præmia oppprtunè compensemus.) *Datum Neapoli. V. Idus April. Pontificatus nostri anno I.* Prædictæ litteræ, ut profertur, novissimè confirmatæ satis clarè demonstrant; quale debeat esse præcipuum Fratrum Minorum ministerium, quanta erga ipsos Personarum Ecclesiasticarum benevolentiam obligatio?

#### Alia Constitutio Innocentii XI.

*IN qua præscribitur modus observandus à FF. Minoribus circa Eleemosynas pro Concionibus oblatas, distributionem librorum, augmentationem Bibliothecarum Ordinis. Innovaturque Excommunicatio S. Sedi reservata contra quoscunque auferentes libros, aliasque Scripturas à Bibliothecis ejusdem Ordinis.*

*INNOCENTIUS Papa XI.*

Ad futuram rei memoriam.

XXIII. **E**Xponi Nobis nuper fecit dilectus Filius, Franciscus Diaz à S. Bonav. Lector

Lector Gen. Jubil. Charissimi in Christo Filii nostri Car. Hisp. Regis Concionator, & Theologus, ac pro Ultra-Mont. Familia FF. M. Ord. S. Francisci de Obs. nuncupatorum in Romana Curia Vice-Commissarius Generalis. Quod dudum, videlicet anno MDCLXXXIII. in Capitulo generali dicti Ordinis circa Eleemosynas quæ Concionatoribus ejusd. Ordinis fieri solent, & libros FF. Defunctorum, communibus Bibliothecis Conventuum Ordinis applicandos, ipsarum Bibliothecarum conservationem, & incrementum, uti ac bibliothecarum institutionem facta fuerint pro utraque Familia nonnulla Statuta, tenoris, qui sequitur: Prædicatores quicumque eleemosynas prædicationis prætextu oblatas penitus non recipiant, nec de iis sub quovis prætextu, vel quæsito colore disponere, aut quomodolibet tractare præsumant, & audeant; sed si absolutâ prædicatione, vel ante eam contigerit à quovis genere personarum Prædicatoribus eleemosynarum oblatio: respondeant Syndicis Conventuum duntaxat liberè & integre transmittendam ac consignandam esse.

Quod si constiterit, quempiam Prædicatorum per se, vel per alios pecuniam recipere, vel recepisse: proprietatis pœnâ omnino puniatur & actibus legitimis per sexennium privetur. Quam pœnam etiam Guardiani subeant, si eorum culpâ vel negligentia contrâ fieri contigerit.

Adeo nihili penduntur his temporibus Conventuum nostrorum bibliothecæ communes; ut quæ aliàs diligentius erectæ, splendorem: nunc verò negligentius desertæ dedecus potiùs Religioni afferre videantur. Ut igitur opportunum adhibeamus tanto malo remedium, præcipimus Provincialibus sub pœna privationis officiorum irremissibiliter incurrendâ, ut vigilantius curent defunctorum FF. libros, fideliter, & quò citiùs fieri poterit, transmittendos ad communes biblio-

thecas; præcipientes insuper universis Superioribus, cujuscunque gradûs ac dignitatis existant; universis etiam Subditis; sub pœnâ Excommunicationis ipso facto incurrendâ, & sub aliis etiam, item gravissimis pœnis, ad Superiorum beneplacitum infligendis; ut nullo modo nec per se, nec per Syndicum Apostolicum sub quovis prætextu, quæsito colore, occasione, vel causâ alienent, vendant, commutent, donent, aut quomodolibet aliter distrahant defunctorum libros, aut eos, qui ad particulares bibliothecas quâvis ratione pertinent, vel quomodocumque fuerint etiam deinceps Monasterio acquisiti.

Verùm ad opportunam communium Bibliothecarum restaurationem continuam accretionem, & perpetuam conservationem præcipimus omnibus Provincialibus, sub priorum Officiorum privatione; ut quolibet anno ducentos ad minùs aureos nummos P<sup>is</sup>. Diffinitorum interventu, & consilio, de communibus eleemosynis expendendos studeant in libros, consimili eorundem Diffinitorum interventu, & consilio communibus Bibliothecis applicare. Sed cùm ratio dicter, & experientia doceat, bibliothecas communes brevi temporis spatio consumptum iri, nisi Bibliothecarii instituatur, qui libros disponant, ordinent, in classes redigant, purgent, reficiant, reparent, ac cætera præstent; quorum executione prædictæ bibliothecæ suo pristino decòri reddantur, & in eo conserventur; consulo præcipimus Provincialium Ministris, sub pœna privationis Officiorum, ut tempore Capituli, & Congregationis instituendos curent Bibliothecarios, qui vel Prædicationis munere præditi sint, vel saltem, qui universali & competenti quâdam facultatum, librorumque notitiâ polleant. Memoratarum bibliothecarum libris uti possint Prædicatores, & Lectores præsertim, iis tamen legibus: ut scedulam, quæ acceptorum libro-

brorum numerum contineat, quæque propria manu libros accipientium subsignata sit, in manibus Bibliothecariorum relinquunt, qui nequeant, nisi unius mensis spatio ad summum traditorum librorum usum permittere, ita ut absoluto mense commodatos libros repetant, eosque bibliothecis ad reliquorum Fratrum usum restituendos omnino procurant. Bibliothecarii, qui dictorum librorum restitutionis executionem omiserint, propriis Officiis spolientur; & Fratres, qui acceptos libros restituere noluerint, ulteriori librorum participatione privati existant.

Cum autem, sicut eadem expositio subiungebat, licet Statuta huiusmodi subinde à *fel. record. Urbano Papa VIII. Prædecessore Nostro* de consilio tunc existentium S. R. E.

Cardinalium, negotiis & consultationibus Episcoporum, & Regularium Præpositorum confirmata fuerint; nihilominus illa, prout etiam quædam litteræ *S. Pii Papa V. Prædecessoris* pariter *Nostri* die IV. Novembr. MDLXVIII. in forma Brevis expeditæ, per quas libros à dictis bibliothecis furto subtrahi sub pœna Excommunicationis, cuius absolutio Romano Pontifici reservata esset, prohibuit, non ubique, prout par esset, accuratè observentur. Nobis propterea dictus Franciscus Vice-Commisarius humiliter supplicari fecit, ut in præmissis opportunè providere de benignitate Apostolicâ dignaremur.

Nos igitur huiusmodi supplicationibus inclinati, & Statuta præinserta in dicto Capitulo Generali edita, & à præmemorato *Urbano* confirmata, Auctoritate Apostolicâ tenore præsentium confirmamus pariter & approbamus, illisque inviolabilis Apostolicæ firmitatis robur adjicimus, ac omnes, & singulos Juris & facti defectus (si qui desuper quomodolibet intervenerint) supplemus.

Præterea præfati *S. Pii V. Prædecessoris Nostri* vestigiis inhærentes omnibus & singu-

lis personis Ecclesiasticis, Sæcularibus, & Regularibus, cujuscunque Statûs, Gradûs, Ordinis, vel Conditionis existant, etiam Pontificali Dignitate præfulgeant, eadem Auctoritate harum serie mandamus, ne ex bibliothecis Conventuum, & Domorum Regularium Ordinis prædicti, aut earum aliquâ, librum aliquem, aut quaternum furto subtrahere quocunque modo præsumant. Nos enim quoscunque subtrahentes Excommunicationis sententiæ subiacere volumus, & decernimus ipso facto, à qua nullus ab alio, quàm à Nobis, vel Romano Pontifice pro tempore existente, præterquam in solo mortis articulo absolutionis beneficium possit obtinere; decernentes pariter, præsentis litteras semper firmas, validas, & efficaces existere, & fore, subisque plenarios & integros effectus sortiri, & obtinere, & ab illis, ad quos spectat, & pro tempore quandocunque spectabit, inviolabiliter observari. Sicque in præmissis per quoscunque Judices, Ordinarios, & Delegatos, etiam causarum Palatii Apostolici Auditores judicari, & definiri debere, ac irritum & inane; si secus super his à quoquam quâvis auctoritate, scienter, vel ignoranter contigerit attentari. Non obstantibus quibuscunque. &c. Volumus autem. &c. *Datum Roma apud S. Mariam Majorem sub Annulo Piscatoris XXVI. Octobr. M. DC. LXXXV.*  
J. G. Slusius.

### Constitutio Innocentii XI.

*In qua sub gravi pœna prohibetur, ne res ad Ecclesias, Altaria, Capellas, Oratoria, & Sacristias FF, Minorum spectantes, extra illa, ad usum, vel Officium caterorum distrahantur, vel asportentur, vel commodentur.*

INNOCENTIUS Papa XI.

Ad futuram rei memoriam.

XXIV. **A**liàs ad supplicationem tunc existentis Commisarii Gen. Cu-